

Augusta Gieriet-Tuor

*22.09.1919 - †18.05.2003



Il 18-05-2003 ha'l zenn grond da s. Vigeli annunziau la mort da nossa cara Augusta. Dapi 1997 han las forzas da nossa preziada defuncta schau suenter. Gie, ella ei il davos schizun vegnida dependenta da buna tgira ella casa s. Vigeli. Ins veseva nossa buna Augusta ella sutga da rodas per ina spassegiada. Duas jamnas avon ch'igl aunghel dalla mort splunti, ei sia dimora stada il letg. La dumengia dils 18-05-2003 ei siu pitir staus a fin, ed ella ei sedurmentada per adina

ella vegliadetgna da 84 onns. Tes cars, parents ed enconuschents ein trests e communitai dalla sperdita da quei bien carstgaun.

Augusta Gieriet-Tuor ei naschida ils 22 da settember 1919 si ella bial' ucliva da s. Benedtg Sumvitg. Sco tierz affon da Gion Battesta e Maria Lucia nata Cavelti. El ravugl da siat fargliuns ed en semplas relaziuns ha ella astgau passentar in'emperneivla affonza. Scola primara e reala ha ella frequentau en vischnaunca. Sco feglia veglia eis ella segidada cun grond engaschi sco buoba e matta el tener casa cun sia mamma. Pli tard ha ella dau agid en casa tier outras familias. Duront diesch onns ha la defuncta menau il tener casa tier ina nobla famiglia a Turitg. Il trafficar en casa e cuschina era siu plascher. Quella lavur fageva ella exact e cunscienzus e ses patruns ein adina stai cuntents cun lur survienta.

1952 marida Augusta il vieu scolast Giusep Gieriet che porta la feglia Gritli ella lètq. A Camischolas ella «Posta veglia» ei ussa sia dimora. Pil Giusep e Gritli sco era per sia cara mamma Maria Lucia ha ella giu grond quitau e dau bia carezia. Deplorablamein ha Augusta giu negins agens affons. L'Augusta era ina femna da siu fatg, intelligente, prusa e luvrusa. Saver far ina viseta tier ella e star en cumpignia cun siu consort era in deletg. Buca mo paterlem, na ins saveva discuttar sur da multifars problems ed ei era interessant da sia savida ed eloquenza tier mintga viseta. Secapescha in bien pushegn muncava mai. Vinzens e Lucia engrazian per las bialas uras a Camischolas ed era egl Asil s. Vigeli. Segir han aunc auters era retschiert tonta beinvuglientscha .

Dapi 1991 ein ils coniugals Augusta e Giusep en Casa s. Vigeli Sedrun. En cuminonza

ha la defuncta tgirau leu siu carezau mariu cun premura e carezia tochen 1997. La sperdita dil Giusep ha sgurdinau sias forzas per propi.

Cara Augusta

Cun tonta buontad, carezia e beinvuglientscha ein Tes arcuns setgemblai. Tes cars, parents, specialmein Gritli e nus tuts schein a Ti in grond Dieus paghi sin fossa per tut prestau. Vegli il Tutpussent remunerar Tei cara Augusta cun la pagaglia celestiala. Nus tuts mantenin Tei sco engraziament en buna memoria.

Ruaussa en pasch

Pally Vinzens